

四庫全書

集部

欽定四庫全書

集部

元詩選初集卷三十七

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣周勲

欽定四庫全書

元詩選初集卷三十七

庶吉士顧嗣立編

陳監丞旅

旅字衆仲興化莆田人幼孤篤志於學以薦為
閩海儒學官御史中丞馬祖常一見奇之謂曰
子館閣器也胡留滯於此因勉遊京師侍講學
士虞集見所為文慨然歎曰此所謂我老將休
付子斯文者矣即延至館中朝夕相講習與祖

常交口延譽於諸公間平章趙世延力薦之除
國子助教三年考滿諸生不忍其去請再任焉
出為浙江儒學提舉召應奉翰林文字至正元
年遷國子監丞又二年卒年五十六有安雅堂
集十四卷史稱其文典雅峻潔必求合於古作
者不徒以徇世好而已河東張翥序其集曰天
厯至順間學士虞公以文章擅四方學者仰之
其許與君特厚君亦得與相薰濡而法度加密

虞之獎成後進陳之識所依歸才名接踵相得
益彰昔人風致真不可及也

謝徵君松巢

昔聞徵君在天目松間結巢成久留南榮北郭井里近
西枝東柯邨谷幽蕙帳眠深翠露落石泉釀熟綳花浮
擬借丹梯到高處枳勾桐乳非吾求

友人記余少作因錄之

溪邨積水生寒煙書廬睡起清明天隔溪莫哭人飯鬼

卷三十七
滕間燒錢野風起酒旗山前雨疎疎來禽花低飛鷓鴣
荒墳累累出新草草長如人人又老東門大道青楊間
可憐車馬無時閒

次韻毘陵吳寅夫見寄

季子江海居勝友園池賞臨水咏新詩輕颺送流響丹
花陽林吐綺翼幽竹上雲瀾阻塵躅離思徒浩漭杪秋
辭京邑寒郭艤吳榜宗兄念行役旨酒勞鞅掌承子共
清悰論文發豪爽我貧久僑棲所至類樂廣願得陽羨

田寧慚五湖長風昔詔約言遲莫嬰世網衆仙諒超遙
樓觀滿方丈餘霞散文席斜月生翠幌芳夕令人思思
之不能往晨興即高岡引睇寫孤想

次韻陳景忠見寄

用世已無伎高人方據梧詞林忝供奉客舍候徵呼拓
落需微祿騫騰失壯圖為文下枚孺力穡後孫愉春草
生湖曲莫雲飛屋隅論文尊有螳憶別履非鳬擬汎鴟
夷舸重遊秦伯都山泉斟雪乳石薜淪瓊酥作鱸溪庖

近聽猿野磴紆松風吹綠鬢花雨落紅氍佳什勤相贈
幽期媿獨踰煩君語宗長為我謝寅夫

為蕭元泰題龍虎山巖圖

龍虎之山仙所家我昔夢寐遊其間乾坤風氣結冲秀
中有正一玄都壇羽人授我九節杖林磴窈窕窮幽攀
金宮藥殿起寥廓翠崖丹巘深迴環峯頭時飄白齒苒
石上盡種青琅玕諸巖一覽二十四總似瀛渚蓬萊山
清溪浮空引雪練遠岫隔水來煙鬟就中仙巖更奇絕

上有玉樹皆檀欒紅光半夜出林杪云是石室韜神丹
欲求刀圭已衰疾羽人去我如飛翰褰裳礪曲采芳草
斷猿踈雨春山寒覺來俗事日滿眼歲月冉冉隨驚湍
會稽蕭氏忽相訪笑以此圖令我看夢中羽人貌真似
而我別後鬢毛斑題詩聊復紀疇昔願拂塵服齊鸞
湖上分韻得春字

君子佩明信相期湖水濱時欣宿雨霽晝舸送遊人輕
鷗集蘭渚佳樹變鷺晨山遠煙容淡日出水光新美人

含麗思艷曲歌陽春睽攜會彌歡酣適趣益真茲遊敦
德誼况乃及芳辰

題秋山圖

之子託冲隱秋山樓觀深矧茲及霜晨遐矚沈氛陰翠
巘含白雲丹楓映青林靈谿鳴石溜野屋負層岑趨喧
事多違即曠恒愜心何哉芳月晏而我阻幽尋

次韻許左丞從車駕遊承天護聖寺是日由參政
陞左丞

銀甕呈山麓

地名甕山

鑾輿際水鄉離宮疑馭娑行殿仿飛

翔細浪魚鱗龍輕颺鷗首驤扶桑明遠岸析木度高橋
屏翳時清蹕豐隆夙啓行衛兵環越棘舞女蹈吳航漸
覺仙樓近微聞梵鐸揚石壇登案衍瓊珮雜璆鏘夕渚
休蘭櫂春壺瀉桂漿伊蒲頌內供蘆蔔散林香罷宴蛻
旌動開帆獸錦張弄田低碧樹馳道出金塘畿甸嚴車
輔臣鄰重室廂方欣麟在板復喜鳳鳴陽聖主需賢急
嘉猷賴弼良從容承顧問烏奕拜恩光文米堪華國芳

金匱山房集
卷三十七
非正滿堂協忠成泰治流澤遐荒援古言應切匡時
慮更長誰哉疲土木況乃象為廊

安福李氏臨溪亭

結屋負南郭清溪流屋前端居塵事少水木自幽妍
滌硯弄寒泚鳴琴瀉潺湲沙鳥時近人汀雲相往還烹
鮮
芼溪毛留客坐前軒逝川道體著觀物悟微言

題米元暉溧陽溪山圖

宿雨散曾巘林麓翳煙霏遙山斷復連川上初昕微
我

昔因行役溧陽秋未歸幽子喬松流解后啓郊扉撫景
正若此別離嗟願違覽卷遂終日溪雲欲生衣

題天台桃源圖

天台一溪綠周遭溪南溪北都種桃東風吹花開復落
遊人不來春水高錢塘道士張彥輔畫圖送得劉郎去
昨夜神鵲海上來洞裏胡麻欲成樹

蘇伯修往上海王君實以高麗笠贈之且有詩伯
修徵和章因述往歲追從之悰與今茲睽攜之

嘆云耳

往年飲馬灤河秋灤水斜抱石城流青城丈人來水上

揭謝蘇王

曼碩敬德
伯修君實

皆與遊顧予濫倚橋門席日斜去

坐鼇峰石夜涼共飲明月尊醉眠更聽高樓笛灤河九

曲流濺濺自我不見今三年蘇郎又扈屬車去佇望弗

及心茫然龍門峽中雲氣濕山雨定灑高麗笠別意遙

憐柳色深歸心莫為鵑聲急

龍門道中夏
月多杜鵑

不才未許收

詞垣賦成何日奏甘泉人言凡骨難變化為我致意青

城仙

旅時已注為史
官復勒留助教

題胡氏殺虎圖

沙河野黑秋風颭
棗陽戍卒車載弩
道旁老虎夕未舖
車中健婦不見夫
倉皇下車持虎足
呼兒授刀割其腹
夫骨已斷不可續
泣與孤兒餐虎肉

小混沌

魚復浦中石方
氏得之如今名

大園縣鵲含清滓
倏忽多事中央死
玄精散作萬星紫
天棧不堪參墮趾
日化七十皇有虺
蜀雷難直絢材委

殺妖壺涿驚弗燬剌剌靈光照寒祀老龍乘磧用師紀
俾作魚麗陣中士風雲往來江落水虎臂灘回玉生子
緇文素肌溫栗理方叔得之驚且喜幕蒙錯綺鏑髹篚
閉門乍觀戒貪褫嗚呼混沌乃若此吾終乞之還汝始

謝氏祖孫創灋陽橋

灋陽極目雲氣昏衝風揚波鼉窟翻湘妃抱琴望虞舜
日莫江竹多嘯痕木蘭為舟不可渡誰幻曾淵作平路
天橫夜靜牛渚長海市朝晴蜃樓吐祖孫移山山可移

昔人不信今見之千年猶有召伯埭白面聚斂嗟何為

海谷

歸墟谷在渤海東八紘之水注其中不盈不縮浩無際
吞吐日月含空濛靈龍於此負山出上有縹緲金銀宮
人間相去幾萬里弱水滿眼多迴風琴高來時踏赤鯉
少君歸去乘白鴻秦皇到老不得渡嗟我欲往將焉從
子房有孫海谷子告我有路非難通只隨雲氣相上下
與子共謁扶桑公

分題得車搖搖送方叔高之官

車搖搖薊門路高麗驕馬不受鞭方郎得官上車去薊
門南頭盧水流燕姬十五居酒樓彈箏唱歌折楊柳落
日車前勸郎酒南陌行人往復來幾人似郎得官回郎
車莫驅傷馬足車中本載連城玉車搖搖鄔子洲賣車
買船載旗鼓晴湖風輕聞樵謳

題蒙泉吏隱圖

世皇昔日收雲南鯨鯢伍伍手所戡烏蒙烏撒腹心地

不有軍府誰其監漢廷遣將非充國累歲屯田無善績
兵驕民獷土不畜國帑空曾糜萬億大名劉侯文武才
承詔萬里誅蒿萊豪蠻盡戢戎壘立竄卒復還農畝開
有泉遠出蒙山下日夜清冰鳴石罅渠分澮決來縱橫
土脈浮膏作秋稼府中侍積多如山陂池種魚無膜乾
已聞春磴響林際仍為蒹葭流園間劉侯暇日遊泉上
賓吏追從憶冲暢步隨涼影傍高松坐看晴雲起孤嶂
朱轡奕奕來甌閩喪車遙返黃河津雲南戰骨橫四野

布穀聲中荒春草劉侯雖死應愁絕吟魂空咽泉頭月
祇今寧謐重謀帥九州人去無歸轍荔支臺館開尊時
劇談每及西南陲淒涼遺像畫圖裏對此流涕將奚為

哭陳元麒

阿麒能讀書八歲貢京國翺翔公卿間聲譽頗藉藉我
家越山南汝家越山北及我官橋門見汝長五尺翩翩
丹穴雛五采作毛翮崑崙上瑤樹上有實可食汝胡不
此留而去不可即乃翁攜汝來為汝頭盡白辛苦攜骨

歸江離黯愁夕可憐東門吳任達乃彊釋

陳新甫生日出紅玉盃飲為賦

崑崙東阿含海日石中玉子如日赤神工夜發昆吾刀
剡作金盃盛酒喫蟠桃初開維母家丹露滴如芙蓉花
廣陵公子酒如海年年顏色襯朝霞

題陳氏瀟湘八景圖

軒后不張樂白月照野水泠泠水影中瑤瑟泣湘鬼

洞庭

秋月

西崦生夕霏歸僧度林嶽但覺山路長不覺鐘聲遠寺煙

鐘晚

百貨集亥市莫徭偏買鹽山日出未高翠雨濕酒帘山

晴

倦翮久欲下涼風起湖北官客多挾弓莫近白沙驛沙平

落鴈

落日楚江深倒景在高樹曬網茅屋頭分魚石梁步漁村

夕照

南浦草仍碧高樓日易斜歸帆傍水廟簫鼓下神鴉

浦遠

歸帆

江氣行雲莫忽失巴陵樹一夕洞庭波都向蓬上注

瀟湘

雨夜

寒雲不成雨暝色凝江楓巫峽梨花夢飄浮過郢中

江天

暮雲

題虞先生詞後

憶昔奎章學士家夜吹瓊瑤泛春霞先生歸卧江南雨

誰為掀簾看杏花

題班婕妤題扇圖

層城柘館重徘徊坐見瑤階長綠苔
紈扇秋來定無用
君王方築避風臺

題畫梅

處士橋邊古岸隈梅花偏向小園開
衝寒有客尋春去
移得晴窗雪影來

題雨竹

江上鷓鴣留客住黃陵廟下泊船時一林春雨垂垂綠
消得晴風爛漫吹

為張壺洲賦壺洲

握日臺高雨氣收扶桑涼影動瀛洲珠林錯落三華露
寶稼離羅五色秋鄰曲夜機鮫有室空中煙市蜃為樓
頗聞雲錦張高士曾與壺公汗漫遊

送張真人代祠武當龍虎兩山追賦

桂館祠官持羽節名山兩地躡丹梯共誇曼倩來金馬

大勝王褒祀碧雞杵澗暝痕消雨石杼巖秋影動星溪
蕙肴椒醕登瑤席定有神光起時畦

題畫圖二首

青紅樓觀護煙霞湖曲高亭竹逕斜日出炎埃生九野
松陰水石養苔花

雨餘空翠轉霏霏杜若洲邊小艇歸又為故人臨野閣
江雲日暮濕秋衣

題泛舟圖

江雲生白石，水木淡幽姿。雙松出叢薄，翠色集遙枝。落日明極浦，楚岫正參差。美人鼓蘭枻，歲晏將何之？

開玄堂下有兩鴈，互浴盆池。王真人命工繪為圖，玉塵山前紫鴈飛。真人燕坐久忘機，餘不溪水連天碧。只借盆池浣羽衣。

次韻本元上人相別

君向雷峰塢邊住，詩成總在倚闌時。蘇堤殘柳凝煙小，葛鵲閒雲度水遲。衲子定回花繞屋，故人別後草生墀。

相知不似相忘好誰說莊周與惠施

次韻韓伯清訪句曲外史

茗雪歸來俗事稀偶然攜客款郊扉
渚霞落盃松花熟溪雨登柂石圉肥
薄宦不閒慙折簡高人相見定披衣
平生願究中黃秘安得茅君指化機

題扇面

剪紙為梅花殘
月夾以素紈

娟娟翠袖倚清空解把剪刀剪雪風
一段寒香吹不盡西泠殘月角聲中

題段氏扇子

上有一枝
著色竹子

江上竹枝歌為君顰兩蛾
秋風團扇底零落黛痕多

題馬道士畫

江上羣山翠作堆
人家門檻對江開
小樓應有憑闌者
天遠歸帆似不來

題水仙花圖

莫信陳王賦洛神
凌波那得更生塵
水香露影空清處
留得當年解珮人

題遼人射獵圖

美人貂帽玉驄馬誰其從之臂鷹者沙寒草白天雨霜
落日馳獵遼城下塞南健婦方把鋤丈夫邊戍官索租
用吳彥暉韻送揚州張教授還汴梁二首

花邊細馬蹋輕塵柳外移舟水滿津莫向春風動歸興
杭人半是汴東人

恩恩歸去緣何事要看揚州芍藥花定有金盤承絳露
送他梁苑故人家

題竹石圖

藍田水曲青玉立雨過秋光滿林濕故人結屋傍幽崖
靜愛石窓晴翠入

題高氏所藏畫圖

誰家林麓近溪灣高樹扶疏出石間落葉盡隨溪雨去
只留秋色滿空山

題畫蘭

九畹光風轉重巖陸露香紫宮祠太乙瑤席薦瓊芳

艾氏心遠樓

聞子臨川上高樓萬里并興來時獨立心與目俱行野
夕歸鴻小溪晴落木明登臨何日共作賦寫平生

送李盤中真人代祀江南三名山

弱水回風不受帆三山只在大江南使槎真帶秋星濕
仙掌遙分夕露甘琮玉禮神通景氣寶香隨地結晴嵐
泰壇建論昭靈貺老我猶能效史談

方壺道士作荒山白雲圖寄豫章楊顯民

之子讀書處亂山生白雲
林花晴冉冉巖瀑暝紛紛
畫此何為者持之以贈君
謂宜作春雨舒卷只成文

次薩天錫韻

燕南幕府文章客澤國相逢
讌集齊酒後鱸魚霜作鱠
花邊驄馬月為題千篇傑句
諧金奏一曲離歌聽玉唳
別後寒雲滿江海鴈書何處
落青泥

題韓伯清所藏郭天錫畫

往年京口郭天錫學得房山
高使君畫省歸來人事少

煙岑閒向客樓分
林扃暝落青楓雨
水郭寒生白蜃雲
歲晚懷人增感慨
晴窻展玩到斜曛

南山詩

山在龍虎山南張宗師藏劍鳥之地曰丹丘有小有洞門玉津澗月橋天鑑池金沙

井躍泉漱雲亭山雲閣丹桂陂桃花源云

江左羣山固仙丘
倚太霞上清分亢爽
南谷抱谿臺
觀黃瓊宅林巒赤虎家
天池開寶鑑日井射金砂
桂實秋巖栗桃烘曉岸葩
泉香通美竹雲液嫩靈芽
俯澗松偏潤緣崖逕
自斜幽亭宜水繞
晴閣受嵐遮
神留丹扃

秘玄闕紫氣賒石橋留月色銀浦渺皇花願解延陵劍
終乘北望槎臨風一解后食我橐如瓜

題羅節婦傳後

羅氏之夫貶海上有強
之為妻者遂自經死

歲晚良人去未歸堂前有客著新衣此身只為韓馮死
化作鴛鴦海上飛

送潘澤民還江南詩

并序

攜李潘澤民往歲來京師貴人有好事者延致
材館且太尉薦之而澤民悵焉有庭闈之思遂

薦為行中書從事欲有以悅其親耳夫懷材抱
藝之士莫不欲自見於宰物之地而徘徊淹遲
無所遇合至於窮不能歸羞見其親戚鄉黨者
豈少也哉若澤民之歸亦可以飲酒而歌舞矣
雖然明時將廣鵠石之功拓康莊之第以徠天下之
賢雋而登用之澤民宜無久留於外也乃為之賦詩曰
之子來京國侯門即曳裾只求毛義檄未獻賈生書野
樹山前合江帆雨外疏故人正相望且莫賦閒居

林外詩為夏生作

幽人遊世入林間
林外高風況可攀
仲御偶然遊洛水
黃公豈必在商山
春深溪雨流花出
日暮松雲載鶴還
拓落塵中嗟我老
歸歟無地可投閒

仲御黃公
皆夏氏也

題城市山林圖

城市山林路不分
畫橋騎馬是徵君
樹頭粉蝶連青嶂
陌上紅塵亂白雲
水巷柳深鶯喚友
陽坡草暖鹿為羣
滑稽誰似東方朔
更向金門避世氛

題耿氏所藏豔畫

五月風生水殿涼
綠楊深處奏鶯簧
佳人偏愛臨池坐
欲與荷花鬪晚妝

送朱蓮峰著書得官南歸

城東有客過吾廬
揮麈高談逸氣舒
金馬豈無方朔伎
石渠今取夏侯書
沙隄老屋秋楓合
海浦歸帆暮雨疎
我亦草玄官拓落
江南無地可耕鋤

題黃鸝海棠圖

二月園池蜀錦殷多情宮鳥喜來看上林春色濃於酒
莫把黃金鑄彈丸

題春宮倦繡雨圖二首

上陽宮樹奏鶯簧蛺蝶羅衣逗暖香
睡思已隨巫峽雨
綵絲偏與日爭長

綠樹垂垂護寶闌牀頭翠帕暴雙鸞
阿鬟可是無情思
又見春風到牡丹

梅石

浦江趙用章宋故家也集
賡完號之為梅石處士

還家不復羨浮榮處士頭街字字清
媿我獨無歸隱地上林春晚更聽鶯

吳王納涼圖

吳王臺榭滿汀洲湖上風來暑雨收
坐擁紅妝可娛老市無赤米不教愁
采蓮舟載煙岑晚響篠廊通水殿幽
歲莫甬東寧有此夜涼歌舞莫令休

和維揚友人

揚子江頭水拍天人家種柳住江邊
吳娃蕩槳潮生浦

楚客吹簫月滿船錦纜憶曾遊此地瓊花開不似當年

竹西池館多紅藥日夜題詩舞袖前

此詩一作馬祖常

題黃筌竹鸞圖

竹有實

一窻晴色綠猗猗羣雀飛來占好枝此竹幾年方結實

空山秋晚鳳雛飢

次韻友人京華即事二首

阿閣棲層幕曉陰扶桑涼影映疎林燕山北擁天都大
瀛海中涵月殿深仙女乘鸞吹紫玉才人騎馬勒黃金

壯遊偶結高陽客無復臨風動越吟

落拓綵衣閭苑間江南遊子醉長安
禁溝春過留香雨宮樹風來響翠澗
五衛旌旗秋向裏千官劍珮曉雲端
何人只獻河清頌宜向明時瀝寸丹

題趙叔隆倦繡圖

龍綃碧樹挂秋水藕風吹香團扇底
琵琶彈歇宮晝長釵落雲邊九雛紫
二妹誰是薛靈芸繡得金塘兩鴛似

一作人去繡
窗春共倚

宮奴夕殿喚更衣

一作夢回涼
館催功裘

露濕銀牀

響桐子

為趙敬叔賦漢海獸蒲桃鏡蓋鄭夾漈家故物也

尚方老冶收精銅金膏玉水開腫朧未央曉月低青桐
六宮秋井生芙蓉當塗妖鬼負神器銅人登車數行淚
寶奩偶落長安市永與人間照珠翠凝陰空祭江心龍
海雨夜入閩王宮一朝愁殺漈上翁破屋日夜穿晴虹
西苑野露堪作酒中有駒駝活欲走趙侯得之莫失手

龍女鮫童俟之久

此鏡得於夾漈之孫鄭子經

郭孝子詩

金臺有孝子郭氏名壽瑛壽瑛執親喪晝夜聞哭聲負
土起崇冢栽松翳玄扃瘦骨寒岳立苦淚春河傾視容
日梅梅一朝廢雙睛復扶大母柩冥行出蕪城願言畢
序葬身瘞心則寧里人問孝子過毀聖所懲孝子哭且
答我非敢傷生有淚不哭親惡乎用吾情親死我目在
徒能視無形黃泉相見日無用此目明吾聞壽瑛語悲
劇不自勝昔人曾有言五色令目盲長年悅紛華眉斧

戕心精視彼郭孝子
婉色能無頹而我嗜
讀書昏花散
秋燈思親不能哭
涕泗空填膺

題趙氏人馬圖

蒲桃宮前白面馬
春日賜與近臣歸
主人愛馬不換妾
更與小奴裁綠衣

次韻阿容參政省中夜坐

上都

上國羣公集
秋深畫省開
虛簷河影近
涼苑樹聲來
獨坐多幽趣
高吟有逸才
平明當獻納
騎馬踏輕埃

院中聞大駕先還再和伯修韻

甘泉宴罷鴈聲寒
桂樹吹香出寶闌
翠輦遙臨秋海白
霓旌高拂曙星殘
瓊城家拜銀虜賜
棘院人爭繡虎看
堪笑子雲能作賦
獨騎羸馬後奚官

三馬圖

豹股龍膺百戰餘
凌煙長樞載璠璣
時平不出橫門道
願為君王駕鼓車

送海豐劉巡檢

隨牒遊丹徼春風騎氣舒
蜚丁鳴鼓吹魚吏掌文書
浦嶼煙霞遠邨墟瘴癘除
石華肥可茹無用膾蜎蟪

贈萊州石工

落星猶帶天河濕絕勝丹丘鬼
血腥琢作大尊休載酒
萊山柏露照人青

汾州北席里石氏節婦

北里高樓晝掩扉水銅光冷上苔衣
寸心誓比南山石
汾水秋風鴈不飛

賦凝春小隱

康里公宅
花廬也

一窻花氣襲人衣
窻底芳塵煖不飛
坐久硯池生石雨

海棠枝上雪都晞

送王致道代祠北岳北海濟瀆南鎮

皇帝齋明守鎮圭
祠官奉節出金闕
北尋海瀆瞻恒岳
南涉江淮上會稽
山下靈風吹桂樞
雲邊仙樹拂丹梯
王褒空有甘泉頌
投老還鄉祀碧雞

送項鍊師還天台

鍊師
能醫

不學東方朔歸尋馬子微人間無藥賣海上有雲飛谷
煖金鵝大溪深土鴨肥當年種桃樹高過石樓扉

送毛真人南還

真人不似壺丘子老去都忘杜德機左乙象文令虎守
尚方鳧舄背人飛巖扉煖翠侵絳帙江渚晴霞上羽衣
游子故園春似海客窻長日聽催歸

春日思遠遊

春日思遠遊遠遊欲何止角哀見楚王伯桃樹中死出

門逢路人天下無二子春山一萬重
春江一萬里上有無心雲下有無情水

次韻答都下友人二首

百金買駿馬千金買紅妝
長安畫樓上飲酒吹笙簧
天園中桃鬱鬱陌上桑
美人越山下白髮生雕房

涼風振高梧繁露集幽菊
攬衣起徘徊殘月照我屋
曾襟鬱孤清日日塵眯目
銀河在天上手短不可掬

元宵懷錢塘

武帝親祠太乙神，流光洵旭動星辰。
行宮典禮猶存漢，軹道山河已易秦。
香逕至今嗟木客，露盤無復泣金人。
紅燈幾點東風裏，猶是元宵一度春。

此詩誤入
倫吳集

和康庸田魯瞻公言懷韻

震澤三江入堰陂，今年春雨又生魚。
漢廷數有寬租詔，魯史元無告糴書。
溝洫已非神禹迹，東西空引白溝渠。
袖中夙有匡衡疏，也擬金門候屬車。

江城即事

江城十日九風雨騎馬出門行紫苔春草綠時猶作客
雲山多處忽登臺青青野竹題詩去小小吳姬喚酒來
漠漠候車乘早發城東昨夜杏花開

題木齋卷

昔年種樹不勝巢老幹今如屋脊高屢許狙公分橡栗
時呼木客醉松醪衣巾白日霑蒼雪枕簟西風夢海濤
歲晚淹留吾倦矣借君叢桂續離騷

桃花幽禽圖

金塘花竹灩春紅枝上幽禽弄暖風
莫把殘英都蹴盡
無情流水畫橋東

題熊雲巢竹石圖

道人種竹三千个定有新巢宿鳳皇
石上幽香飄露粉
簷間新綠裊風篁
天壇月白瑤笙近
水國雲寒翠袖長
見說故人東海上釣竿日莫倚扶桑

送李彥方副使入閩

在奎章閣纂修
經世大典方畢

海邦赤子窮無告詔遣儒臣著繡衣
天祿閣中書灝灝

越王山下馬駢駢魚風滿港榕陰合燕雨侵簾荔子肥
一道澄清俄頃事使星還向紫垣飛

建昌胡氏小有樓

窈窕麻姑宅登臨憶謝公近聞好山色都在小樓中屋
曙丹霞吐城深翠雨通石池正當戶人立藕花風

題子昂江天釣艇圖

雨餘秋水滿山前正是江南落鴈天何處故人魚艇小
亂蟬疎樹夕陽邊

申屠子迪為山南憲掾白部使者毀夷陵曹操廟
黃牛峽口灘聲急楚女傳芭水廟秋此地殷勤祠魏武
何人辛苦得荊州莫令故國無遺祀不見中郎盡發丘
千載有人伸大義高風全似故安侯

送趙子期使交趾

曉日承恩紫殿深都門祖道馬駸駸上書不奏唐蒙策
歸橐寧將陸賈金露入珠盤鮫室白苔生銅柱象崖陰
為君臨水歌黃鵠天北天南萬里心

為彭道士賦鶴峯

在信州城南

跨鶴臺高倚翠微
昔人城郭是邪非
蕊珠宮觀秋如水
有客吹笙月下歸

題張氏風竹圖

湘江風卷白頭波
北渚雲深帝子過
欲采瓊芳渡江去
翠衫輕薄曉寒多

清漳黃氏北墅

聞說黃家墅開門
入翠嵐細岑依舍北
流水出城南雨

暖蘭抽筍霜晴樹落柑千年讀書地更莫乞羊曇

壽吳宗師

晚號看雲道人

九朝冠珮泰階平國有儒仙作上卿碧海宵晴迎日出
黃庭春暖看雲生竹間自洗金鵝蕊花外長留翠鳳旌
莫學華陽貞白老乞身神武聽吹笙

送余嘉賓赴常寧州判官

家在洞庭左舟行湘水間湍流多度竹石聳不依山野
郭看花出州田載稻還舊聞官事少幽興轉相關

送楊田甫巡檢之官潮陽

與君相識三十載解后都門白髮生南海珠明飛別鶴
上林花暖轉新鶯蜚丁浦口迎官艦瘴母雲頭避使旌
自是昇平游宦樂不教瀧吏惱吟情

程氏竹雨山房

江南春盡雨泠泠繞舍篋簾含積陰圓曲疏泉石苔滑
籬根繫船溪漲深山寒翡翠巢密葉日暮鴈鳴遠林
此時世慮淡於水聯牀燈火百年心

西山詩

并序

至順三年六月之吉西山新寺之穹碑樹焉是日
百僚無敢不至碑所余與趙博士繼清早作出平
則門沿大堤並駐蹕亭下轉入湖曲逢趙宗吉成
漢卿二編修與劉敬先典籍騎驢從蒼頭挈匏尊
邀余與繼清就隄側藉草坐灌木延陰風泠然生
澗底幽鳥鳴其上命蒼頭隄傍取荷為盤以實腊
肉倒尊中濁醪飲數行甕山流黛與湖影相盪涵

於盃盤巾被之上余在京師七年蓋未有一適如
此時也酒盡三君子起曰子於此能無詩乎余言
歸即賦之及歸以職事縻繞少清趣明年三月宗
吉持紙來索詩戶外雪深二尺無他客乃賦詩曰
蓐食出西郭初日明遠川聯鑣走山麓山樹盡含烟紫
石擁馳道綠水侵弄田高人湖上來解后野澗邊茂柳
垂密幄曾莎布柔氊回風颭幽爽有鳥聲清圓采荷薦
珍腴洗殘行芳泉夫容濯新雨迴立方嬋娟晤言攄素

抱逸思慕遐騫窈窕紺園夕珠林映璇淵黃金作臺殿
縹緲集諸天顧慙凡躅汙亟去不敢遭適意無先期重
尋有中悵華月忽易改賞心與時遷晨興望雲物皓雪
滿層巔

題雲林晚晴圖

故人別後江波綠神女歸來峽雨乾海上日花春冉冉
天邊雲樹曉團團滿汀芳草留孤艇度石幽泉咽下灘
最愛東頭小亭子聽鶯何日一憑闌

陪趙公子遊蔣山即席次李五峯韻

甲戌十月一日也

弭權丹陽郭鳴鞭白下山晴原煙翳翳幽樹烏闌闌石
液玻瓈碧雲根瑪瑙殷佛巖開細菊僧逕入叢管雨洗
川容淨潮隨野色還六朝有遺事盡在夕陽間

陸氏菊逸

望仙橋下市廛間汨汨紅塵沒馬鞍誰種禽花滿幽徑
故收野色入晴闌籬根荷插培深雨鄰曲移杯對早寒
玩此芳叢足怡老南山當戶不曾看

送鄧文質

薊門風雪貂裘敝寒橐能多季子金
萬里壯遊孤硯在
十年歸夢亂山深
春來草色生南浦
日煖鶯聲滿上林
空閨庭前看流水
浮榮何足累初心

白畫眉圖

隋家宮妓掃長蛾
銷盡波斯百斛螺
化作雪禽春樹頂
遠山無數奈愁何

送葉天根南還

我識天根子于今二十年吹簫來翠嶺鼓枻入丹淵日
出扶桑底雲生建木巔人間方夜半海上得春先老我
江湖迴微官歲月遷荒泉流竹里冷雨浸芝田髮短何
為者君歸重惘然飛霞浮夕景定在石林邊

郊居

郊居息塵事日夕望青山青山秋氣多白雲出其間露
渚野芳集楓林江色寒夷猶感流序況乃曠幽攀

吳宗師赤城阻雨次甘泉韻

三十六盤唬杜鵑杜鵑唬盡到平川
千山白雨作秋氣
六月赤城堪晝眠銀渚星槎留使客
竹宮風帳候神仙
衰余病起橋門下目送晴雲度楚天

送宜黃劉縣尹

寶劍妝成即遠遊
郎心何似妾心憂
茜裙香濕芙蓉雨
翠袖涼生薜荔秋
江北長愁寧滯酒
周南多病莫登樓
海門潮落江瑤美
能把千金買越舟

與陳敬初同舟北遊題餞行卷後

我愛天台陳敬初少日辭家即遠圖上書擬獻賈生策
入關便棄終軍繻八月官河秋水大三江親舍莫雲孤
名成歸去歲未晚卜鄰有約依東吳

秋山行客圖

雨餘空翠晚濛濛有客騎驢落木中滿目好山行不盡
溪猿啼斷石楠風

題楊氏所藏畫圖

山光濃淡雨初晴曲曲江清樹色明若買草堂江上住

盡開窻戶看雲生

縉溪道士

縉雲溪上縉雲山
春水流出桃花灣
白頭道士鶴為馬
月明騎過居庸關

送鄭子經遊霞城

子經與我真弟兄
海風十二吹青苹
桐花影裏忽相見
美人為奏青樓笙
酒酣氣盛欲飛起
謂可戾契圖功名
樓前雪惡鴈欲墮
寶鞭笑指丹霞城
人生聚散亦何有

歲月與子相崢嶸金臺有約不可爽春船擬破滹沱冰
和蕭秀才歌風臺

歌風臺前野水長王媼賣酒茅屋涼酒邊父老說劉季
頭戴竹冠歸故鄉山河霸氣已消歇颯颯老柳吹斜陽
臺前小兒更擊筑筑聲更似三侯章

東歸歌送鄭子經

北風吹山蕉葉黃長亭野日寒荒荒驅車送子歸故鄉
人生此處堪斷腸舊遊回首秋山下醉帽簪花同走馬

歡娛如此離別何華月芳年不堪把子今去矣來何時
翠壺雲深那可向來亦有燕山期子今去矣來何時

三筍吟

并序

子經家藏三筍圖予作三筍以志之

蜀妓椎蘭如截肪蛟工夜織青犀裳翰林待詔擅花竹
硯屏春透宮雲香鏡根薦鮮玉生汗南風入林翠胎綻
牙根冤血點點紅三鳳聲沈九秋晏太官金錡陳淳熬
看圖未必蘊爾曹饒夫煮箐政未熟見此豪奪君其弢

張書巢畫圖

萬里青城叟歸尋江上山瀑
喧春雨過汀暗暮雲還駐
馬白沙曲裏人綠樹間薊門有巢父幽興最相關

秋荷圖

持衣寄所思欲寄不得遠水國風露涼徘徊九秋晚

明妃出塞圖

昭君北嫁呼韓國巫山更有昭君村黃金鑲鞍玉驄馬
分明載得巫山雲涼風吹動釵頭燕一曲琵琶寫幽怨

沙草遙連難鹿塞野花不種鴛鴦殿內家日日選娉婷
淚痕滿袖空多情漢廷自此恩信重美人身比鴻毛輕

崇碧軒詩

并序

江西張繼明歸進賢山中屋前後皆高嶺前嶺
曰瀑盆蓋謂飛瀑若塵盆然門臨清溪溪受飛
瀑張氏有田如千畝溪行田間後嶺旁有深谷
多古木屋東為軒四楹豫章松竹雜樹與山俱
青因名軒曰崇碧奎章學士虞公為大書之繼

明又來錢唐求詩於予詩曰

豫章山中多豫章長松大竹相扶將屋東微見紅日動
簷曲細含翠雨涼洗空絲瀑落溪艇暖客錦苔鋪石牀
何時到子軒下坐太朴顯民同瓦觴

危太朴楊顯民皆繼明之所厚而其

居又相近也

先天觀

山中有田百畝有石泉曰丹鼎澗中有石如船

龍虎山南古澗阿幽人住處白雲多十林總種三珠樹
百畝曾收五色木丹鼎夜光迎海日石船秋影接天河

環中異趣知誰會我欲窮源過碧蘿

送王君實御史西臺


除書朝下五雲間
閣吏新移玉筍班
恰恰黃鸝鳴苑樹
遲遲驄馬過鄉關
濯纓長樂宮前水
挂笏終南雨後山
不羨相如文似錦
到官三日詠詩還

張將軍廟堂詩

將軍燕人大德五年征西南夸陣亡時年七十

將軍頭白更征蠻
平宋吳鉤血尚殷
萬斛樓船上江去
半空鐵馬哨雲還
淒涼部曲清笳畔
窈窕祠堂綠樹間

堪笑班超真老矣乞身生入玉門關



元詩選初集卷三十七

欽定四庫全書

集部

元詩選初集卷三十八

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣李煥霞

欽定四庫全書

元詩選初集卷三十八

無吉士顧嗣立編

張翥蛻菴集

翥字仲舉晉寧人少負才不羈好蹴踘喜音樂不以家業屑意其父以為憂翥一旦翻然曰大人勿憂今請易業矣乃謝客閉門讀書晝夜不暫輟其父為安仁典史遂受業于李存之門及調杭州又學于仇山邨遠由是以詩文知名薄

遊揚州者久之以隱逸薦至正初召為國子助教分教上都尋退居淮東會修宋遼金三史起翰林國史院編修官累遷太常博士國子祭酒集賢學士以翰林學士承旨致仕孛羅帖木兒擁兵入都強翦草詔不可孛羅誅詔以翦為河南行省平章政事仍翰林承旨致仕給全俸終其身二十八年三月卒年八十二仲舉長于詩其近體長短句尤工初在揚州衆素聞其名爭

延致之仲舉肢體昂藏行則偏竦一肩韓介玉
以詩嘲之云垂柳陰陰翠拂簷倚闌紅袖玉纖
纖先生掉臂長街上十里朱樓盡下簾坐中皆
失笑或曰仲舉病鶴形也時有相士在坐曰不
然此雨淋鶴耳雨霽則沖霄矣後入大都致位
通顯晚年嘗集兵興以來死節死事之人為一
編曰忠義錄識者避之所著有蛻菴集

堂堂

朝為堂堂吟莫為堂堂謳堂堂徒爾竒堂堂徒爾憂不
見膏與蘭煎燼祇自休勿以不遇故棄捐經與史勿以
勢利故棄捐廉與恥勿以行役故棄捐山與水謂夜未遽
央已復明星明仰視何煌煌白露忽沾裳懷人攬予心
何以弗永傷江北亦為客江南亦為客為客多偏兀何
以安所適上有君與親下有妻與息在山則種榆在陞
則種蒲馬牛必維婁舟航必需和富貴富貴友貧賤貧
賤徒歲月來者多江湖逝者遠所願不可迎所期不可

返幸此世累輕歸去衡門偃

雜詩二首

隴坂何崎嶇行人且復止直上望晴川遙遙憶鄉里流
離肝腸斷悲歌不能已一身已遐征永念同室子何殊
轉蓬科隨風四散起雖得同根生不得同根死吾恐古
今淚多於隴頭水

河淮厭兵禍城邑多荒榛百里無幾家但見風起塵燕
雀歸果樹豺虎飢食人鄉來脂膏地死骨今如銀流亡

使復業牛種當及春安得百龔召錯落為拊循征討尚
未息奈何爾遺民

前出軍五首

前軍紅衲袍朱絲繫彭排後軍細鎧甲白羽攢鞬輜
車左右馳萬馬擁上街送行動城郭斗酒飲同儕壯士
當報國母為鄉故懷

鍛鐵作佩刀磨石為箭鏃中軍把轅門前豎十丈纛朝
上盧溝橋夕次洵河曲超乘既誇勇騁馬復齊足男兒

不封侯百年同視肉

昨日發萬軍今日發萬軍明日發萬軍
梟騎來羣羣馬蹏所經過黃埃蕩成雲
堆糧與作飯倒樹與作薪道途行者絕
那得有居人

大軍北庭來部伍各有邨放馬原陞枯
磨刀河水渾行行且射獵雉兔不復存
野次羣馳卧弓箭挂車轆幽幽笛聲起
日莫傷人魂

京師少年子膽氣乃麤豪傾金售寶劍
厚價買名刀白

璽作行帳紅綾製戰袍結束往從軍談笑取功勞當時
霍驪姚豈在學戎韜

後出軍五首

步卒愴楚健長刀短甲衣大叫前搏敵跳蕩如鳥飛左
提血髑髏右奪賊馬歸黃金得重賞顧盼生光輝爾輩
疾歸命將軍足天威

我軍城東門呼聲震屋瓦百萬山壓來此賊何足打狂
鋒尚力拒轉鬪血噴灑城中有暗溝多陷人與馬將令

母輕入明當一鼓下

先鋒才改門後軍已登陴拔都不怕死直上奪賊旗馬
前獻逆首脚下踏死屍長河走敗船疾遣飛將追幕中
作露板應有傳修期

行行鐵兜牟隊隊金駱駝鳴鳴吹銅角來來齊唱歌總
戎面如虎指顧揮琱戈馬蹏無賊壘手筭可填河王師
本無敵安用戰圖多

魔賊生汝亳獠賊起于海嬰鋒天狗觸墮網奔鯨賊徐

金史卷三十八
方一戰收振旅已奏凱江浙塵既清豫章園亦解諸將
如竭力削平行可待

中秋望月

當年見明月不飲亦清歡詎意有今夕照此長恨端近
聞錢塘破流血城市丹官軍雖殺賊斯民已多殘不知
親與故零落幾家完裴回庭中影對酒起長歎死生兩
莫測欲往書問難仰視雲中鴈安得托羽翰淒其衰謝
蹤有淚徒闌干山中松筠地棄置誰與看河漢變夜色

西風生早寒累觴不能醉百念摧肺肝

漸農歎

浙南有農者家僅一兩車王師征淮蔡官遣給軍儲翁
無應門兒一身老當夫勞勞千里役泥雨半道途到軍
遭焚烹翁脫走故閭車牛力既盡戶籍名不除府帖星
火下爾乘仍往輸破產不重置笞箠無完膚翁復徒手
歸涕洟滿敝襦問家牆屋在榆柳餘殘株野雉雖梁門
狐狸穴階隅老妻出傭食四顧筐篋無有司更著役我

實骨髓枯仰天哭欲死醉吏方歌呼

送黃中玉之慶元市舶

昔我遊四明壯觀真海波褰裳寶山頂曙色寒嵯峨日
輪鎔生金湧出萬丈渦雲氣忽破碎朱光相盪摩決皆
蓬萊宮携手扶桑柯羣仙迎我笑佩羽紛傿傿颼風欵
驚潮騰擲鱷與鼉浮槎徑可擊從此超天河精神動百
靈上下煩撫訶歸來已十載遠夢時一過君家賢父兄
儒術傳世科薄言捧省檄舶署聊婆娑是邦控島夷走

集聚商舸珠香雜犀象稅入何其多權衡較低昂心計
寧有訛資閱須厯試壯圖詎蹉跎維君官事隙為訪巖
之阿懸應仙者徒往往嘯且歌遐征渺不見空響遙相
和因聲兩黃鵠持我紫玉珂豈無滄洲興奈此塵劫何
古促促辭

促促何促促丈夫生兒美如玉長城遊蕩不思歸令我
隻身守空屋不願汝學班定遠不願汝學馬相如定遠
生不入玉關相如死不還成都但如塞翁父子長相保

得馬失馬何足道又如龐公携家隱鹿門遺安遺危俱不
論貴而衣貂不如貧而緼臬離而食肉不如聚而飲水
身雖促促心得寬為汝白頭屋中死

北風行

長河風急波浪惡青天晝黃塵漠漠剗齧波中舟盡泊
官船捲帆與水爭牽馬毛寒撾不行禿樹挂戛枯蓬驚
夜深風定浪聲死憲光倒揺天在水前伴相呼隨鴈起
帽絮不煖衣生稜老質獨語愁河冰上開下開應覺凌

篙師指直失增減明星欲明霜似糝館陶城南鼓紞紞

螢苑曲

楊花吹春一千里獸艦如雲錦帆起咸洛山河真帝都
君王自愛揚州死軍裝小隊皆美人畫龍韉汗金麒麟
香風搖蕩夜遊處二十四橋珠翠塵騎行不用燒紅燭
萬點飛螢炫川谷金釵歌度苑中來寶帳香迷樓上宿
醉魂貪作花月荒肯信戟劒生宮牆爛斑六合洗秋露
尚疑怨血凝晶光至今落日行人路鬼火狐鳴隔煙樹

腐草無情亦有情年年為照雷塘墓

城西路

城西路多少人從此中去昨日紅顏美少年今朝白骨
委黃泉縱令藏金比山積鬼伯不受人間錢少年何用誇
豪富來看城西送人處

發古城鋪

黃蒿古城風卷沙澗頭衰樹嘯寒鴉歲云莫矣霜露積
夜如何其星漢斜滿衣落月行人起馬上夢魂猶在家

王貞婦

青楓嶺頭石色赤嶺下嶧江千丈黑數行血字尚爛斑
雨蕩霜磨消不得當時一死真勇烈身入波濤魂入石
至今苔蘚不敢生上與日月爭光晶千秋萬古化為碧
海風吹斷山雲腥可憐薄命良家女千金之軀棄如土
姦臣誤國合萬死天獨胡為妾遭虜古來喪亂何代無
誰肯將身事他主兵塵瀕洞迷天台骨肉散盡隨飛埃
楓林景黑寒燐墮精靈日莫空歸來堂堂大節有如此

正當廟食依崔嵬君看嶧江之畔石上血當與湘江之
竹淚痕俱不減

題牧牛圖

去年苦旱蹠敲塊今年水多深沒鼻爾牛骸骸耕得田
水旱無情力皆廢畫中見此東臯春牧兒超搖犢子馴
手持鵝鵠坐牛背風柳煙蕪愁殺人兒長犢壯須盡力
豈惜辛勤供稼穡縱然喘死死即休不願徵求到筋骨

題李白觀泉圖

玻璃杯中春酒綠醉墨淋漓牡丹曲平生合置七寶牀
白紵烏紗美如玉阿瞞荒宴百不理寧計宮花銜野鹿
何如老嫗生此兒偷向金雞帳中宿高將軍纔奴隸耳
誤使脫鞵吾所辱要留汗鞵蹋鯨魚鼠子何堪煩一蹴
尋常溝瀆不可濯何處容伸遭汗足翩然却下匡廬雲
五老峰前看飛瀑

題郝內翰書所作夢觀瓊花賦後

釣魚山前龍上天武昌城外走蜀船老姦欺國馳露布

使者坐因吞雪瓊潰兵一夜甲填水血汗木棉花下鬼
豈知老仙方卧遊鶴背天風扶夢起顏雲披月光西流
玉簫聲斷江聲愁露華泣盡瓊樹死廣陵春色寒於秋
百年遺賦人爭重勁墨遒毫精爽動節旄零落喜生還
回首江南已如夢花神換根春更芳想像月色扁餘香
楚招無人青鳥去公不少留涕泗滂

題長孫皇后諫獵圖

黃門曉出西清仗秋色滿天鷹犬王虎落遙連渭水南

鸞旗直渡河橋上日邊雲氣五色文虬鬚天子真天人
羽林猛士森成列六氣不驚清路塵太平無征帝神武
豈為禽荒將按堵已知哲后佐興王不數樊姬能霜楚
從容數語即罷田六宮迎笑花如煙蹕回那待外庭疏
聽諫由來同轉圜天寶神孫隲大業錦繡五家爭蹀躞
可憐風雪驪山宮正與真妃同射獵

題華山圖

華嶽連天向西起瀕洞秦川三百里巨霸高掌削笑容

影落黃河一絲水雲臺霧谷巢神仙羽衣金節時周旋大
笑失脚白羸背歸來石上長鼾眠千載悠悠寄玄賞耳
孫風骨猶蕭爽遠從丹丘渡滄海追挹神蹤欲長往何
人想像圖真形疊厓陰洞高林青上摩金天之帝京下
攬玉女之明星峰邪麓邪兩莫極虎豹叫絕煙霏冥仙
家樓觀超然住遙認微茫是征路丹梯鐵鎖不可攀直
喚茅龍上天去

金宣孝太子墨竹

沙海神光射天起中有蟠龍龍有子混同江聲何處來
卷作淋浪墨池水蜿蜒欵起鱗鬣張蛻骨立化千筭簪
一朝侍臣抱髯泣鶴駕不歸雲路長百年梁苑陵谷變
流落人間能幾見明昌內府應秘藏小字親題保成殿
吁嗟帝子真天人此君亦作天人真君不見洋州老太
守揮灑雖工無此神

并州歌送張彥洪使畢還河東

吾鄉故人零落盡見子老成殊慰心祥金百鍊乃利器

桐尾方焦逢賞音河東臬府幕下士飛傳來作朝正使
太和嶺上盜已空旌旗盡是官軍紅殺人如麻道路絕朝
狐莫梟競巢穴嚴風歛起霜倒飛塞日黯淡寒無輝子
來未幾遽言歸使我東望淚沾衣豈不聞并州少年遊
俠子手携玉龍最輕死并州將軍劉越石夜半登臨長
歎起汾河直來繞郡城鴈門離石寒崢嶸老旻四葉彈
丸地大梁全師勞再征一朝征賊輒破碎大將不誅天
失刑為子作歌歌憤激眼中太行如動色安得壯士射

烏弓為落欖槍連太白

城南

城南北風朝卷沙將軍開宴樹大牙黃鬚健兒飽酒肉
十十五五來將車盡驅丁男作生口鬼妾鬼馬充其家
嗚呼上天不可問道傍觀者徒咨嗟

范寬山水

憶昔往尋剡中山南明天姥相縈盤客路上頭穿鳥道
行人脚底蹋風湍旦寒露重多成雨洩霧濛雲互吞吐

僕夫相呼巖壑間空響磨人作人語溪窮岸斷地忽平
石門壁立如削成隔水無數山花明中有人家雞犬聲
向來老眼曾到處此境俱作桃源行百年留在范寬筆
水墨精神且蕭瑟上有翰林學士之院章恐是宣和舊
時物林猿野鶴應自在令我相見猶前日時平會乞閒身
歸一壑得專吾事畢

題趙文敏公木石有先師題于上

吳興筆法妙天下人藏片楮無遺者南陽詩律動江湖

一篇才出人爭寫二老風流傾一時只今傳畫亦傳詩
清涵月露秋見影黑入雷雨寒無姿仇山黃鶴去不返
茗溪鷗保歲俱晚好呼鐵爪夜錚錚刻向青珉照人眼
題李早女真三馬扇頭

金源六葉全盛年明昌正似宣和前寶書玉軸充內府
時以李早當龍眠想當畫院供奉日飽閱天閑萬奇骨
等閒游墨落宮扇駿氣凌風欲超忽霧鬣風髮翦別新
郎君^缺玉為人四帶紗巾繡衣領醉鞭蹋盡燕臺春

一聲白鴈黃河莫豈料征蹠竟南渡回首西風障戰塵
女仙空抱琵琶去

題陳所翁九龍戲珠圖

雨龍頡頏出重淵白日移海空中懸一龍回矯一倒起
側磔胡髯怒歛水大珠炎炎如彈丸爪底雲頭爭控搏
一龍仰首逆鱗露兩龍旁睨蒼崖蟠怪風狂電浩呼洶
天吳倅立八山動一龍後出尤崛竒半尾戲繞蜿蜒兒
兒生未角已神猛一顧却走千蛟螭陳翁硯池藏霹靂

往往醉時翻水滴便覺天瓢入手來
雨氣模糊渾是墨
我嘗見畫多巨幅簸蕩驚濤駭人目
何如此筆窮變化
三尺微綃形勢足是翁前身定龍精
故能吸歛奔精靈
卷圖還君慎封鐫但恐破壁飛空冥

畫馬

後有宋思陵
押封以御寶

睿思殿中萬幾暇縹帶犀籤閱名畫
君王愛此神駿姿
筆勢不在韋韓下五雲御押手自封
玉窠蟠屈宸篆紅
百年重遭赤馬劫散落不逐兵塵空
誰歟傳之能愛惜

尺楮蕭蕭開古色驪驄玉面蹠腕白青絲絡腦黃金勒
風髮半散頭怒側一團渥洼雲氣墨緋衫圍郎緊控持
直恐驕騰收不得向來南渡小朝廷虎視欲與金源爭
蜀襄馬場能幾匹尚想按圖心膽傾只今萬里龍沙道
游北千羣飽豐草天閑上駟皆乘黃駑蹇紛紛世空老
題泰東山藏主十八開士圖

環瀛茫茫去不窮大鯨吹浪鼓颼風樓船如山不敢過
況在泛葦浮蕉中西方八大尊者徑渡萬里猶乘空

犀行水開蛟蜃露直下蹋入天吳宮
龜魚背高盂錫穩中流正與靈槎同
怪頭達拏四罔象一單舁出龐眉公
鼻端噓氣作飛塢舌上彈呪招降龍
兩僧促膝披貝葉一衲裹足須山童
雪毛白鹿岐角健斑尾黑虎雙睛紅
最後坐禪如古佛從渠搏控何神通
吾聞浮屠多善幻作詩自賞畫者工
君不見海波橫潰鬼神惡我無其術
安能東

息齋竹石古木為會稽韓季博士題

上有歐陽原功承旨題

老竹葉稀多禿枝，新竹碧潤含幽姿。
籜中龍子振春蟄，突出雷雨頭參差。
傍蹲怪石石罅裂，裂處恍惚疑龍穴。
山中有樹皆十圍，活幹撐青死槎折。
霜皮食盡乾蘚文，半頂斬立雙桮分。
最後一枝身出羣，垂枝倒走陰崖雲。
李侯標致不可得，小字親題別塗黑。
縱橫不在摩詰下，蕭爽直與洋州敵。
玉堂學士欣見之，濃墨大書真崛奇。
森然一片鐵石筆，妙甚七字瓊瑰詞。
此詩此畫今兩絕，把翫微風動毛髮。
只應真宰泣瑚璉，一夜山窓冷秋月。

休洗紅二首

休洗紅洗紅在水新紅換作棠蔕紅翻作裏回黃倒
綠無定期世情翻覆君所知

休洗紅洗紅紅減色雖好不如新著時須愛惜阿母好
女不擇人雞飛狗走長苦辛

悲寒風

夜漫漫風凜凜嚴霜下寒更甚狐鳴鬼歎有今夕倉卒
劍戟生高枕神光墮地摧白虹鳴呢英雄淚空飲

周昉按樂圖

美人按樂春晝長
綠鬟翠袖雙鳴璫
玉簫高吹銀管笛
二十三絃唬鳳凰
後來知是調箏手
窈窕傍聽曾誤否
梁州徧徹六么翻
此曲惟應天上有
行雲不動莫雨生
流鶯瞥目飛鴻驚
宮馳羽疾爭新聲
花月六宮無限情
君不見後庭玉樹梨園譜
日日君王醉歌舞
一朝鼙鼓動地來
祿兒危似韓擒虎
丹青縱復王何益
由來嗜音必亡國
田家機杼人不知
好寫幽風勸蠶織

杏葉黃

杏葉黃杏葉黃胡蝶雙飛來飛來東家牆東家女兒繡
衣裳可憐胡蝶惜流芳妝鬢無心蘇合香起彈牀上箏
自歌杏葉黃杏葉青時君去鄉坐見黃落思斷腸安得
致之在我傍君不來天鰥霜

寒漏明次韻王子常

寒漏明時一聆夜長不能寐月色明階庭西風落葉爭
秋聲難曉未曉霜滿城城中有思婦正促征衣成東家

西家砧杵急使我起坐時時驚歸心如廢弓屢折不可
繫寒漏明時一聆

黃河

檣後風才順桅頭日未斜舊河通剡子新浪漲桃花得
鱸因沽酒聞鶻更憶家迢迢雲氣外北望是京華

泊淮口

濫濫潮初上移舟出浦中岸分清濁水帆掉合離風儻
楚方言雜徐揚地利通何殊入喬口懷古思無窮

早發魯橋

路滑雨初歇山昏雲不開
看鐙野店近聞鐸賈車來
馬飽力方健蜚寒聲易哀
偶逢南去使早早附書回

泊隆興章江門

把酒西風裏挂帆南斗傍
夕陽城角盡人影水中長
問俗勞羈旅干時礙俊良
平生查上意漂轉意難忘

衡山福嚴寺二十三題為梓上人賦

錄十

般若寺

般若南朝寺思公第一傳拓開方丈地坐斷再生禪貝
葉收經夾曇花散法筵山神應夜缺來禮佛鐙前

一生巖

初地靈峰下重來為講經神應合掌受石亦點頭聽雲
鶴隨飛盜湖龍入淨餅至今花雨處長照一鐙青

二生塢

塢寺前朝舊山林宿業空法身無幻壞藏骨自神通寶
供珊瑚碧珠光舍利紅無緣香一瓣回向佛堂中

三生藏

神僧涅槃處那有去來今尚記三生石難磨萬古心地
埋禪刹在山掩嶽祠深長日聞鐘梵蕭蕭楓桂林

天柱峰

一柱標南紀神功自斷鼇寒通岫嶠遠勢敵祝融高異
鳥流清響神鐙見白毫危顛可觀日夜湧海東濤

隱身巖

磨世苦熱惱山林長夏幽嶽神來護法尊者坐經秋呼

粥魚頻響銜花鹿自遊法雲長散滿七十二峰頭

嶽心亭

何許新亭好軒窓窈窕深天開雲四面地據嶽中心雨
綠蘿蕪道風香蒼蘆林曉嵐收不盡猶作半山陰

目雲亭

兩公俱古佛遺跡在新亭塢寺疑神造山川本地靈峰
秋陽鴈斷潭暮雨龍腥老宿忘言久閒拋案上經

兜率橋

傳是竺僧說幽如兜率宮驅龍劈地險架石補天空星
土熊相合雲沙驚領通闌干倚來久時度吉祥風

藏雪寮

雪山一片雪何日落中華皎潔無藏處虛空自作花石
厓穿乳竇海岸疊潮沙底用分荆越諸方總是家

次柱德常僉院韻

鼇禁欣同直高閒勝俗忙露花迎夕斂風樹借秋涼太
史蘭臺筆郎官粉署香時時鈴索靜有喜到巖廊

馮秀才伯學以丹青小景山水求題

沙禽毛羽新來往采桑津野水碧於草桃花紅照人
乘回遠山莫窈窕江南春芳思不可極悠然懷釣綸

送觀性空上人歸省

白髮高堂在青山舊業貧載經隨客舫留偈別禪鄰
行路半春雨近鄉多故人一龕還可老莫污衲衣塵

話舊送胡士恭之京師

話舊共禪聯河橋且繫船春歸花滿地江闊雨連天
處

士題鸚鵡詩人拜杜鵑此生雖老去未敢媿前賢

送鄭喧宣伯赴赤那思山大幹爾朶儒學教授二

首

絕漠同文軌提封振古稀大牙開武帳元老秉天威
白馬紫駝酒青貂銀鼠衣那思山水曾覩六龍飛

野散千軍帳雲橫萬里川寒多雨是雪日近海為天
黑黍供甘釀黃羊飽割鮮廣文但少客寧慮坐無羶

宮中舞隊歌詞二首

十六天魔女分行錦繡圍千花織步障百寶貼仙衣回
雪紛難定行雲不肯歸舞心挑轉急一一欲空飛

白玉琤欒燕黃金鑿步蓮簫吹鳳臺女花獻蕊宮仙香
霧團銀燭歌雲撲錦筵請將供奉曲同賀太平年

鴈聲

嘹嘹數鴈度流響一淒然半落淮南雨遙沈海上天疎
砧欲斷處哀角未吹前我亦離羣者聞之夜不眠

偕鄢元止善東門視田

白骨如亂石荒邨殊慘神惡風生殺氣斜照逼歸人應
俗悲多故全生幸此身青青原上麥亦復可憐春

大駕時巡千官導送至大口

萬乘巡行遠三靈佑護多旌旄隨大纛鼓鐸雜鳴駝雙
日浮黃繖微風送玉珂臣心如草色不斷到灤河

松巢為潛川謝堯章作

林棲有隱君結構出塵氛就樹遮青雨牽蘿補白雲雙
鳩從此拙獨鶴與平分華屋非無數山中了不聞

蛻菴歲晏百憂熏心排遣以詩乃作五首

開歲七十五故園猶未歸看從今以後知復是邪非
星斗天垂象龍蛇地發機邊聲近稍息一醉典春衣
小小新齋閣溫溫舊氍毹精神全藉酒筋力半支藤
蟄豸深坏戶冥鴻巧避矰蒙頭衲被底何異在家僧

世路正如棘吾生猶繫匏詩人歌蟋蟀軍士歎蟪蛄
無地營家食何心解客嘲山林徒在眼難覓一枝巢

書舍如僧舍心閒與靜宜寫多髭免頽藏久艸貂皮官

蹟年勞見生涯日歷知未應同與俊肯負沃洲期
久悟無生法從容與化遷機忘棹俯仰道悟審中邊宇
縣猶多壘干戈已十年吾惟待其定歸種故山田

七月二十九日

此醜今方殛京城蹀血新也知天悔禍誰謂國無人勝
氣騰龍虎沈機動鬼神大庭親命詔終夜在延春

此詩為李羅帖木兒作李羅之入京師使仲舉草詔
不從嘗作自誓詩曰此醜行當殛吾身敢顧危要
看奪勢處正是結纓時萬古千秋在皇天后土知
寸心三尺簡肯愧史臣詞與此詩是一時作也

歲晚苦寒偶成四章錄似北山

錄二

清眠夢屢覺霜氣轉淒淒春近鴈北向月明烏夜啼
香留墨篆燭淚聚銀泥少釋幽憂疾尋君一枝藜

鼠劣翻書冊貓馴伴坐氈吟懷忻雪夜疾目畏風天惟
酒能消日無方可引年我詩猶偈子一問北山禪

四月十三日

白丁驅上城徒手不能兵鬪將無人色行涂多哭聲惟
將孔達解竟遣風沙烹滿眼黃塵莫悲風慘淡生

城東廢寺

一徑入荒寂松風長夏寒夜叉棲敗屋魔女去空壇古
佛金全剝遺碑字半剝時逢好事者來剔蘚文看

西內應制卽事

烽火連齊魯干戈接隴秦四郊多壁壘萬里半煙塵將
帥屯兵久君王遣使頻老臣叨視草進罷益沾巾

行次獨石驛大雨駟行二十里喜晴

段段青天出浮雲四散歸燕忙攬馬過蠅亂撲人飛遠

道倦行李故山思采薇北風朝已冷未敢御絺衣

有旨翦領宋史刊于江浙次東阿站

南來十五驛幽絕獨斯亭下榻月初上卷簾山更青
千時嗟莫齒從事厭勞形寂莫江雲外誰知有使星

發漳州

萬里漳南道遙連嶺嶠東山寒冬息瘴海近晝多風
廢圃攢筋竹疎林落刺桐檳榔新善啖一解宿醒空

至通州

去歲南歸以九月十二日發通州
今年召入亦以是月日至通州云

驛卒爭鳴鼓舟人喜下桅依然今日到恰似去年回岸
黑秋濤縮川紅夕照開君恩忘險阻不覺畏塗來

清明遊包家山二首

乙丑

遠近紅千樹鯨開奪豔霞月明寒食雨春老上陽花輦
路迷遊躅宮詞入夢華東風葵麥浪回首野人家

太液曾來鵲高臺舊影娥美人黃土盡故國白雲多野
草荒神籍宮蓮怨權歌羌兒洗馬處斜日滿寒波

秋試後胡益士恭歸番陽與遊吳山聖水寺

高處見滄溟西風吹酒醒潮來一片白山擁萬重青草
木如浮動煙塵忽杳冥登臨不可極吟思滿秋汀

南園宴集雨歸有作

驟落菰蒲雨遙生菡萏風歸雲龍井黑倒照鳳山紅簾
莫舟頻引衣涼酒屢空歌聲未可放花底有驚鴻

遊石頭城清涼寺用天錫題壁詩韻

捫蘿上絕頂嵐氣濕繽紛日色不到地樹陰渾似雲僧
歸過嶺見樵唱逆風聞更待詩人醉狂書白練裘

大風

徹晝風何急避行陵樹旁驚沙撲面黑野日映人黃科
斗旱未出粟留寒尚藏窮途淚易下不是阮生狂

悼太平公

晨起灑杯酒北風吹淚痕豈徒歌楚些端欲叫天闔碧
化萇弘血春歸杜宇魂千秋一史筆誰辨逐臣冤

太平之再

相也朔思監等益嫉之尋
構之于太子逼令自裁

清溪濯足圖

黃塵滿雙足宜賦故山歸解屨就清泚舉頭看翠微林
損下窺膝石蘚欲粘衣更覓漁竿伴閒來就釣磯

聞董孟起副樞乃弟鄂霄院判凶訃哭之

羣盜猶銅馬將軍真虎牙死當為厲鬼生不負皇家野
色含沈日河聲怒卷沙征東失名將朝野共驚嗟

陪東泉學士泛湖

山靄忽空無春暉正滿湖船頭載家樂花裏駐行厨樂
任喧呼動歸從酩酊扶使君留客意更為倒金壺

題汪會語邨隱居

聞道荆邨僻幽居趣自成桑中豚宰晚芹外燕泥晴苔
石留僧坐山尊遲客傾憑軒久不到望得白雲生

伍牧

宋將尹玉授常
州戰死于北

苦戰勤王事精魂泣鬼雄壞城兵氣黑遺鏃血花紅故
老談忘國明時錄死忠長吟一搔首落日鳥呼風

謀臺

嬪御親弓韉祠謀有古臺瑤池今寂莫玄鳥自歸來鼎

再移支子星俄圻上台興亡闕歷數祇遣後人哀

無題

見時畧畧望遙遙有月闌干待袖招得巧蜘蛛絲縷細
傳聲鸚鵡舌闌嬌仙家絃管寧無譜天上星河亦有橋
雲雨或時消息斷不如朝莫石城潮

聞笛

何人吹笛傍江干木落淮南夜色寒三弄水邊人樣擢
一聲雲杪客憑闌梅花簌簌吹人落楊柳依依折欲殘

惆悵綠珠何處在綺窓深鎖月漫漫

臺城

一作題金陵

運盡黃旗晉祚開
天星俄復圻三台
方驚掘地雙鵝起
已見浮江五馬來
草暗離宮碑卧土
雨殘戰地骨生苔

當時一掬新亭日
猶帶寒潮日莫迴

一作誰信清談自有才

冶城

此地先皇駐六龍
鼎成龍去杳無蹤
御牀羅帕塵空暗
輦道朱門草已空
題榜侍臣留帝勅
築亭真士記天容

自憐不及窺弓劍愁絕寒城響暮鐘

鹿苑寺

千古南朝幾劫灰蕭梁寺額獨崔嵬
化蛇妒婦餘空井刺虎將軍有舊臺
江口山紅寒照沒石頭樹白暝煙來
滿衣落葉西風急更為憑高送一杯

七憶

憶錢塘

平湖十里碧漪風歌舫漁舟遠近同
天竺雨餘山撲翠

海門潮上日蒸紅
傷心花月隨年換
回首閭閻委地空
白髮故人零落盡
浮生悵望夢魂中

憶姑蘇

讓王城外暮雲黃
忍使行人哭戰場
臺上麋遊香逕冷
陵頭虎去劍池荒
竹枝夜月歌仍怨
蓴菜秋風興漫長
不是不歸歸未得
五湖煙水正茫茫

憶會稽

千巖秋色徹曾霄
憶昔來乘使者輶
翠袖屢扶蓬閣醉

籃輿時赴寶林招山陰客已無春會溪上風猶送莫樵
此恨古今消不盡西陵寂莫又回潮

憶維揚

蜀岡東畔竹西樓十五年前爛漫遊豈意鯨華今劫火
空懷歌吹古揚州親朋未報何人在戰伐寧知幾日休
惟有滿襟狼籍淚何時歸灑大江流

憶金陵

昔年曾上鳳凰臺二水三山眼界開六代餘華春草歇

千年興廢莫潮哀
鐙窓禪坐時聯句
山館仙遊幾引杯
最是令人愁絕處
夕陽雙燕自歸來

憶吳興

憶汎苕華溪上船
故人為我重留連
半山塢寺藏雲樹
繞郭樓臺住水天
白榜載歌明月裏
青帘沽酒畫橋邊
計籌山下先塋在
欲往澆松定幾年

憶閩中

一作襄清源洞游
原注云時方兵後

漫漫際海漲天涯
萬里曾乘使者槎
梓澤重尋仙客洞

草堂頻醉故侯家人多熟酒燒藤葉市有生蠶賣象牙
安得夢中真化蝶翩然飛上刺桐花

秦淮晚眺

一作武定
橋晚望

赤闌橋下莫潮空遠火疎春掩靄中新月半天分落照
斷雲千里附歸風嚴城鼓角秋聲早故國山川王氣終
莫訝時來一長望越吟荆賦思無窮

中秋廣陵對月

散盡浮雲月在東白蕉衫冷小庭空星河夜影尊罍裏

城郭秋聲鼓角中
落葉有光時墜露鳴蛩無響不含
風此生五十三回見只遣嫦娥笑禿翁

上元宿通州楊原誠寓宅

禁城東下一川平
杳杳煙蕪淡淡晴
風滾暗塵羊角轉
水披殘凍鴨頭生
離居有酒春堪醉
小市無鐙月尚明
還憶故園今夕賞
玉人花底共吹笙

丁亥元日

梅花院落雨聲中
意外春寒淅淅風
臘酒撥醅浮玉

蝻夜銍挑燼落金蟲星環甲紀驚身老雪解寅朝驗歲
豐還喜驛書催上路寸心長在日華東

喜雨

久旱
苦蝗

日氣如焚土氣腥黑雲當午忽冥冥雨工分下旗千隊
神姥携來酒一罇牛馬長河迷渚渚龍蛇平陸起雷霆
快看一洗飛蝗盡猶及秋田晚稼青

清明日到陳莊

出郭東門古道斜獨騎款段穩於車春纔三月已兩月

邨舊百家無十家山逕低飛鬼蛺蝶野塘競噪官蝦蟆
東風不奈晚愈惡吹散滿身楊白花

春日偕監中士友遊南城

一作游南城莫歸和伯器典簿博士諸君韻

樓閣參差紫翠間微風不動綵雲閒柳垂禁籞絲千尺
水繞宮溝玉一環春樹鳥鳴圓似筦夕陽駝影兀如山
醉鞭緩緩吟歸去鐙火城東未掩關

上京秋日三首

山前孤戍水邊營落日無人已斷行甌脫數家門早閉

贛溫千帳火宵明白催野草狼同色
秋日榆關鴈有聲
最是不禁橫笛怨海天秋月不勝情

水繞雲迴萬里川鳥飛不下草連天
歌殘勅勒風生帳
獵罷關氏雪沒羈紅頰女兒花作隊
紫髯都護酒如泉
時巡歲歲還京樂別換新聲被筦絃

遠山平野浩茫茫曾是當年古戰場
飲馬水乾沙窟白
射鵬塵起磧雲黃中郎節在仍歸漢
校尉城空罷護羌
今日車書逢混一不辭垂老看羶鄉

三月二日賞杏花光岳堂分韻

柳色初青草漸茸春寒猶勒杏花風
新煙院落清明後
過雨園林罨畫中
洛社衣冠今日再
蘭亭觴詠此情同
吾年最老身仍健
更向尊前借酒紅

臘日飲趙氏亭

城上高亭一再過
每看風物費吟哦
近詩頗效寒山子
往事徒成春夢婆
賸買十千燕市酒
閒聽二八越娘歌
梅花枉報春消息
祇遣今年別恨多

秋日陪吳興諸府公宴魯公池上

芙蓉池上會羣公滿意華筵笑語中虹影連蜷山外雨
荷香澹蕩晚來風歌催銀甲箏逾急涼入金尊露易空
我亦玉堂揮翰手題詩合在水精宮

中秋張外史招賞月失約賦以謝之

明月中天霧氣消酒醒涼思正飄飄星河不動秋空闊
鐘鼓無聲夜寂寥露下遠山皆落木風來滄海欲生潮
仙家玩事無緣到虛負瓊樓聽玉簫

元詩選初集卷三十八